

Quatter reschissurs grischuns èn quest'onn a Soloturn

■ (anr/vi) In film dal reschissur Hercli Bundi e trais auters films grischuns stattan sin il program dals Dis da film da Soloturn. Il festival va anc fin la dumengia. «Der Code» sa numna il film dal reschissur *Hercli Bundi*. Il film che va 12 minutas raquinta da Polo. El è currier e duai purtar ina cofra cun juvels engulads sur ils cunfins. Polo ha gia surpiglià milli giadas talas missiuns. Ma questa giada na funcziuna betg tut tenor giavisch. Gia avant che Polo ha la cofra, èn auters bandits a dies ad el. Polo na sa betg, sch'ìls bandits vulan la cofra u sia gula.

Hercli Bundi è naschì il 1964 a Cuir. El ha fatg il diplom da reschia a Lausanne. Dapi 1992 è el editur e tecnicist da tun per films documentars. El è era sta «co-director» da la seria «Die Direktorin». Auters films: «2000 Romanische Poesie» e «Not Vital – half Man, half Animal».

«La rusna» da Sedrun

Gieri Venzin è naschì a Sedrun. Da quest lieu vegn era il film «Das Loch» ch'è damaun sin il program a Soloturn. La rusna numna la glied a Sedrun il tumbin che va 800 meters en la pro-

funditad e finescha giu en il tunnel dal Gottard. Venzin raquinta en ses film da la vita en ed enturn la rusna: La glied da Tujetsch exprima speranzas e temas. Ils miniers ston ir di per di en la fora. Ils geologs speran ch'els han jan quanta endretg. Ed Alfred vul bajegiar in bordell.

Fin 1997 è Venzin stà redactor tar la TvR. Dapi 1998 fa el films documentars per la Televisiun da la Svizra tudestga u per 3sat. «Das Loch» è vegni emess en «Doc». Suenter han era la televisiun romanda e tessinaisa mussà il film che cuzza 49 minutas. La TvR ha emess ina versiun curta.

Duas ustarias en l'Engiadina

Medemamain damaun pon ins vesair ils dus films documentars dad *Arnold Rauch*: «Ustaria, la seria nr. 1: 'Kursaal' Samedan» ed «Ustaria, la seria nr. 5: Posta veglia, Ardez». Omaduas gastarias èn restadas decennis a la lunga adina tuttina. Sch'ins entra en las ustarias, sa sentan ins immediat bain. I vegn endament ad ins il temp en il qual las uras gievan anc pli plaun che oz. Il reschissur raquinta en sia seria dad ustiers ed ustieras, da lungas

notgs, d'allegrezza e stentas. Rauch è ditg stà redactor dal Radio Rumantsch. Dapi 1995 lavurava el per la TvR.

Dunnas van a chatscha

«Dunnas a chatscha» vegn mussà damaun e la sonda. *Menga Huonder-Jenny* ed *Urs Frey* han realisà quest film l'onn passà. Dunnas duain parturir e dar vita. Tenor questa devisa na dastgassan ellas atgnamain betg ir a chatscha. Tuttina datti chatschaduras. Il film dals dus cineasts Huonder e Frey mussa quatter dunnas durant il temp da chatscha. Igl è dunnas tut differentas che raquintan tge impurtanza che la chatscha ha per ellas.

Huonder-Jenny è naschida 1965 ad Andeer. Ella è giugadura da teater e da film. Suenter ch'ella ha fatg l'academia da film a Berlino, ha ella era cumenzà a filmar.

Urs Frey è naschì il 1960 a Samedan. El ha lavurà sco schurnalist, pedagog da museum, sco scolast da dissegn u vi da projects d'istorgia agrara grischuna. Dapi il 1998 è in ulteriura occupaziun vegnida vitiers: cineast.

Il program detaglià dals Dis da film chattan ins sut www.filmtage-solothurn.ch